

[Augsburg], 6. April 1566

An Johannes Oporinus

UB Basel, Fr. Gr. I 11, fol. 285r.  
Steinmann Nr. 775.

S. P. D. Literas meas, Clariss[ime] D. Oporine, de rationibus Augustanae Bibliothecae et lucubrationibus meis, tibi esse redditas spero, et omnino mihi polliceor, his literis tibi redditis, me votorum meorum fore compotem, quae quidem tibi maiori commodo sunt et minori molestiae quam mihi. Quid enim peto aliud, nisi, ut quantum ex aequo, et bono tibi debeatur, signifiques, idque quamprimum accipias? Alterum leuisculum est, ut defectus compleantur. Sed si me etiam nunc destitueris: necessitas me coget petere a Senatu, ne tua cessatio mihi fraudi sit, utque ego absoluar. Tu postea videris, quomodo tibi satisfiat. Ego per omnem aetatem caui ne quid deberem priuatim. Debere publicè, et officium erga te meum sine vlo fructu priuato meo mihi fraudi et tantae molestiae esse, grauiter et iniquo animo patior, praesertim cum tu me horis ad summum duabus ea liberare possis. At fidem mihi habes? Primum non mea res agitur, nisi κατὰ συμβεβηκός, ut officio me functum esse constet. Deinde magis amo eos, qui statim a me quod debeo exigunt, quam qui me bonum nomen esse putant. Εὐδαίμων ὁ μηδὲν μηδενὶ ὀφεῖλων. Ego mihi omnem diem credo diluxisse supremum, neque velim haeredibus meis (si quid forte humanitus mihi accideret) pro pecunia aes alienum relinquere. Etsi enim nihil debeo, sed omnia persolui, et plus etiam: tamen si haeredes mei, homines imperiti talium rerum, rationes reddere non possent, f. 455 cogerentur dependere per summam iniuriam. De lucubrationibus meis tibi accommodabo, quantum per fata et fidem Willero datam licuerit. Vale. 6. Aprilis 1566.

Hiero[nymus] Wolfius.